

Guekcoj, Gou Vih Mwngz Miznaj

“Geiznding hajsing nyigrumz mbinmyag, singgo ndaejhingz geijlai goksag, haenhciengq guekcoj ndeigyaez gyoengqraez, daj neix byaij coh hoenghvuengh fouqak……” Moix baez ciengq souj go neix, ndawsim gou cungj gig gikdoengh. Gou vih gou dwg vunz Cungguek miznaj, gou vih gou seng maj youq aen guekcoj hungmbwk neix miznaj.

Guekcoj, gou vih mwngz miznaj, aenvih mwngz diegguek gyaunde. Daj gwnz deihdoz yawj, mwngz lumj duz gaeqboux ngiengx gyauej ciengqgo nei, daengj youq baihdong seiqgyaiq. Diegsang dieg-gumz hwnjhwnj roengzroengz, megbya, dahraemx vangraeh gyauc, gyoebbaenz baenz fuk baenz fuk dozveh byaraemx gyaunde. Baihnamz giuz iq raemx lae, baihbaek naehau gvangqlangh, baihsae langhloet gvangqyup, doengh gijneix cungj hawj vunz louzlien haeujmaez, youh baenzlawz mbouj hawj gou miznaj ne?

Guekcoj, gou vih mwngz miznaj, lij aenvih mwngz lizsij gyaeraez, vwnzva ronghsag. Mwngz dwg

“seiq daih guek ciuhgeq vwnzmingz” seiqgyaiq ndawde aen ndeu, miz lizsij vwnzmingz raez daengz haj cien bi. Gij lizsij gyaeraez neix, cwkomz le vwnzva ronghsag mwngz gag miz haenx: Cangzcwngz fanhleix seiqgyaiq mizmingz, Baekging Gugungh heiqseiq hungmbwk ndeiawj, seiq daih fatmingz vunzvunz cungj rox…… Gijneix cungj hawj vunz haenh mbouj dingz, youh baenzlawz mbouj hawj gou miznaj ne?

Guekcoj, gou vih mwngz miznaj, engq dwg aenvih mwngz lwglan lai raeuh, hoenghvuengh fouqak. Mwngz dwg daxmeh hungmbwk gwnzbiengz, seiqseiq daihdaih raekciengx lwglan geq cungj geq mbouj liux, vanzlij lwglan maenndei okyienh mboujduenh, geq mbouj rox sat. Youq Cungguek gungcanjdang lingjdauj baihlaj, guekgya ginghci riengjrit hwngfat, gohyoz gisuz fwt mbin vaiq bae, saedcej yinzminz youq onj maij hong. Gijneix cungj sawj seiqgyaiq gak guek yinzminz aeu da moq yawj mwngz, gijneix baenzlawz youh mbouj hawj gou



miznaj ne?

Gou yaek sing hung doiq mwngz gangj: Guekcoj, gou vih mwngz miznaj!

(seiq nienzgaep Cai Meijnungz)

Cingz Ndawsim

Gou miz aen sibgvenq ndeu—— maij dawz mbangj mbawfei yungh gvaq haenx, mbawsiengq cinglleix baenz baenz cek, lij youq henz sij hwnj gangjmingz. Mwh ndaej hoengq, gou couh dawz okdaej yawj. Daxmeh naez gou dwg boux vunz ndawsim miz cingz he. Gou roxnyinh, dauqngex doenghbaez, cij engqgya insik seizneix.

Ndaw cekde nem miz mbawfei haenx, feidenyingj dwg gou yungh sim daej cinglleix. Gangj hwnj mbawfei denyingj, mbouj ndaej mbouj gangj daengz ndawde sam mbaw. Henz fei biu miz “gou gyaez mwngz, guekcoj” geij cij saw neix. Sam mbaw fei neix dwg sam mbaw fei denyingj 《Hungzhaij Hengzdoengh》 gou caeuq daxboh daxmeh doxcaez bae yawj haenx. Cungsime saehgienh bouh denyingj neix dwg “ciepma Vazgyauz”, hawj gou yinsieng gig laeg. Gawq gangj, bouh denyingj neix dwg gaengawq saehgienh caensaed gajbien baenz. Guekgya

raez cingqcaih hung’ak, vunzlai yied daej yied vuenyungz. Gwndaen youq aen guekgya vuenyungz neix, moix boux vunz Cungguek cungj vih gij cingsaenz ndaw denyingj haenhdaenq haenx saenq-hwnj.

Ndaw cekde, miz mbawsiengq gou, hix miz mbawsiengq daxboh daxmeh. Miz mbaw siengq he dwg youq ndaw Sinjangz Gunghyez Bozvuzgvanj ingj. Ndaw siengq dwg gou ndwn youq baihnaj gyaq cigunghgyauh gaeuqgeq he, gyaq cigunghgyauh neix “gwnz gyauej” miz song diuz lienh, lumj song diuz mengq nei. Daxmeh heuh de guh “cigunghgyauh mengqhung”. Daxmeh naez, de mwh iq couh naengh cungj cigunghgyauh neix. Riengz dwk gohgi cinbu, cungj cigunghgyauh neix mbouj yungh lo. Seizneix raeuz cij ndaej youq ndaw bozvuzgvanj yawjraen gij yiengh de lo.

Doenggyaq mbawsiengq caeuq saedcej ngoenzneix doxbeij, raeuz ndaej yawjdaengz seizdaih bienqvaq. Miz mbaw siengq ndeu, dwg gou mwh lwgnding, daxmeh umj gou dwk dienhvah, aen soujgih de dwg aen soujgih geq goeng-naengz genjdanh he. Seizneix, vunzlai yungh soujgih cinaengz, gij goengnaengz de couh lumj aen dennauj he. Neix youq doenghbaez siengj cungj mbouj gamj siengj. Gohgi fazcanj ngoenz beij ngoenz ndei, saedcej raeuz couh lumj goraz hai va——hoh beij hoh sang.

Gou vih gou dwg vunz Cungguek ndaengmoj, gou vih gou gwndaen youq aen seizdaih neix roxnyinh miznaj! Gou gyaez guekcoj gou caeuq mbanjranz gou, neix dwg cungj cingz ndawsim ndeu, engq dwg cungj hengzdoengh ndeu. Gou itdingh ndeindei doegsaw, ndeindei majhung, daengzcog vih guekgya gensez dem cien gya vax!

(Cangh Yizcenh)



Fangzhwnz Ndaem Va

Haemhlwenz, gou yawjraen go vameizgveiq gou ndaem de hai va lo. Hai song duj va henjrkrwk bae. Raq rumz ndeu ci gvaqdaej, song duj vameizgveiq henjrkrwk de naihnaih bibuengq, sawqmwh mbin hwnjdauj, bienqbaenz song duz mbungqmbaj henj youq henzgyawj gou mbinfiufiu, liux youh sawqmwh dingz youq gwnz song diuz mengq gou, bienqbaenz song aen hotmbungqmbaj henjrkrwk youh gyaunde.

Gou angqfaengz liux, couh ndiu lo, nditndat daj bakdangq ciuq haeuj gwnz mbonq daej. Gou couh bae ciuq gingq, guhlawz gwnz mengq saek yiengh cungj mbouj miz ne? Song aen hotmbungqmbaj gyaunde de bae gizlawz lune? Dwg mbouj dwg youh bienqbaenz mbungqmbaj mbin dauq go vameizgveiq de bae, bienqbaenz song duj va lune? Gou couh doq bae gyanghongh yawj, hoeng, go vameizgveiq de saek duj va cungj mbouj miz nauq! Dwg mbouj dwg youh bienqbaenz song duz mbungqmbaj mbin deuz lune? Yawj vei! Duz meuzraiz manz de naengh youq bangxhenz bat vameizgveiq swiqnaj, itdingh dwg duzmeuzraiz yaek bae gaeb gyoengqde, gyoengqde couh mbin deuz lo——Bingzseiz miz duzmbungqmbaj mbin haeuj gyanghongh daej, duzmeuzraiz baezbaez cungj gyaep gyoengqde, coemj gyoengqde, yaek gaebdawz gyoengqde.

Hai! Duz meuzraiz manz neix!

(Daj《Bonjsei Sim Lwngnyez》(Veiz Gizlinz raiz) senj okdaej, Lwgfwnzmeh/卢奋长 hoiz)

